

蜀

水

經

蜀水經卷之九

京山李

瀘水

瀘水謂之金沙江源出吐蕃犁牛山

地理今釋曰源出諾莫澤五巴什山有二源一自阿
六江流出一自烏斯藏流出合流至阿克拉分支一
支南入雲南爲漾備江一支南入塔城關爲麗水李
穆堂曰金沙江發源於西番之阿克達母必拉烏蕮
之拜圖都洪共南行千八百里過裏雍源屯始名金

沙江又東南行九百里過塔城關至麗江府又南行
四百里至陶營巡檢司又東北行千里至雪山入四
川界又北行千二百里有打冲河來會又東行三百
里至凉水井折而北行七百里又東行四百里至馬
湖府又東行二百里至敘州府楊澤先金沙江考曰
源自達賴喇嘛東北烏捏烏蘓流出譯言乳牛山也
其水名母魯烏蘓東南流入喀木地昔人謂源出吐
蕃後其龍川犁牛石下紆折而南謂之犁牛河犁牛
卽乳牛也又經吐蕃鐵城橋繞老君山漸轉東南經

中甸入雲南塔城關名金沙江入麗江界始東行訛
犁水爲麗水繞巨津寶山二州地曰巴塘曰趙可曰
蒲字力曰降刺普曰石鼓皆江之所經也又自西浪
滄過北浪滄雪山之西趾受麗江鶴慶樣其江諸水
由是歷大巨倖可入永寧府界轉革泥入刹七日入
北勝州界受桑園龍潭諸水自北勝之東經賓川受
大河水經大姚之苴却有三江口其北爲四川會川
衛之紅卜苴地則鹽井衛之打冲河與建昌衛之安
寧河交會於此紅卜苴界內有鮮賓者杉木聚於此

其南爲苴邦抬馬地由此渡白馬扯者車邁資雲龍
王湖乃受蜻蛉弄棟龍蛟左膊諸水過此入武定江
頭村則楚雄之龍川江廣通之羅繩河合黑流井入
元謀納西溪河水至州之腊甸入江又里許至巡檢
司官渡爲滇蜀大道其北岸阿波賒至迤招亦屬武
定界江南岸自官渡下導罵刺母鮮石母猪灘白馬
口受州之龍慶關只苴高橋插甸諸水又歷燦刺則
五曲革受山溪諸水其北岸之竹鮮普龍則會川衛
界也受梨溪松平關諸水其南岸越五曲革至普利

則入祿勸沿江五馬地江北受會川衛及通安州姜
州會理州諸水江南渡覺捏至曲阜界撒馬基亦設
有官渡以通獅廠至土色鸚哥嘴受普渡河及補知
他頗小五龍諸水滇境盡此矣普渡河故納滇池之
水也蓋滇水發源邵甸自北而南下盤龍江積爲昆
池倒而西流因名滇水出昆陽石龍壩疊水重重至
青魚塘水勢少緩始折而北流經安寧越羅次富民
至祿勸之大密陀與掌鳩河相合下歷達磯普渡糯
巴天生橋以抵土色而注於江過此渡法戛阿納木

姑爲四川東川府界納迤濯河及大五龍必古壩九
十九渡小江諸水至涼水井設有官渡爲東川達建
昌之道又歷踏照亂得頭峽刺鮓粉壁灘甚駛又歷
驛馬河新灘至虎跳灘陰溝洞天生橋土彝巧家地
其虎跳灘山如峽水多湫洄曰陰溝洞者二山交集
水行山腹中也又歷大小流灘爲蠻夷土司地又歷
黃郎舖貴溪寨業灘至南江口爲烏蒙土府地受嵩
明楊林暨尋甸之車洪江穀壁川齒化溪及東川之
擺河諸水又至文溪鐵索江麻柳灣敎化巖爲馬湖

府地受泥溪大汶小汶諸水又歷洩灘蓮花三灘會
溪石角灘至敘州府南城下會錦江岷江羌江大渡
河合流之水越南溪納溪瀘州渝州循瞿塘灩澦白
帝城達荆楚東吳以名長江而朝宗於東海焉提綱
曰金沙江番名烏魯木蘓亦曰母蘓烏素岷江最上
源也出西藏衛地之巴薩通拉木山東麓山形高大
類乳牛卽古犁石山水東北流折而東南又東北流
凡三百餘里其西北一源最遠出巴薩通拉木之西
五百里山曰勒斜爾烏藍達普蘓阿林水曰喀七烏

蘭木倫東南流屈曲凡九百里東流來會又東北流其南一源出拜都嶺北流曰拜都河自南行三百里來會水勢始盛三源既合東北屈曲流有阿克打木河源出布哈山東北衣克諾木渾烏巴什嶺之忒門他拉二池東北流百餘里衣克水自東北來巴哈水自西來合於阿克打木河西北屈曲又東北流五百餘里入金沙江金沙江北流稍折而西北有托克托乃烏藍木倫水源出勒斜爾山東北四百里之西金烏藍拖羅海山東流屈曲八百餘里入金沙江金沙

江又北百餘里折而東流又東南有波羅必拉水源
出察蘇拉圖山二水西流而合又西北而北流二百
里與烏藍必拉水會烏藍必拉水源出格爾吉匝噶
那之西麓烏藍池池周七十餘里自西流屈曲百餘
里巴圖拉木南自多倫巴士兒嶺來會于烏藍必拉
又北流會枯博渾必拉水其水東北自二池南流合
而西南而西百餘里來會於烏藍必拉又西北流會
阿羅必拉又西北五十里郭汝克必拉北來注於烏
藍必拉又西北折而東北流屈曲四百餘里入金沙

江金沙江又北而西北折向東流有洞布倫山左右
二水一出其西一出其東夾山而北數百里合而西
北流入金沙江金沙江又東百餘里至那木唐龍山
之北孤羅板波羅濟山之西南始折東南流有土虎
爾河源出同布勒西洛西山爲空楚河亦爲和秦河
兩水北流而合東北經好勒嶺及活阿洛好勒查罕
峯之東北會卓爾長山之水又北流百餘里會兀爾
几根嶺之烏捏必拉水又北流經巴木巴拉嶺西曲
折流至薩拉龍搭拉山北入金沙江金沙江又東南

屈曲有那木七圖烏藍木倫水源出巴顏哈拉得里
奔山東南流折而南又折而西南入金沙江金沙江
又東南流折而西南又南岐爲數派二十里復合又
東流有枯枯烏蘓水東北自巴額喀喇西倫衣山來
注之又東折而西南有小水自西來注之又南岐爲
二派三十里復合南流左受一小水經殷得勒圖西
勒圖山及特爾烏朱山之西南麓有圖哈爾圖哈喇
烏蘓源出古爾拔拖兒哈圖山西南流九十里折西
北曲流六十餘里受可蘓七老河又西北百二十餘

里北流折而西南受毛伸和爾和河又西南五十里
受噶布拉河又西南三十里入金沙江金沙江又折
而南有衣克苦苦必拉水自西來注之又南百里有
水自西南來注之又東南折而東有池水廣二十餘
里自東北來注之又東南有水自西南來注之又東
折而南屈曲百餘里又折向東百五十里有你林喀
喇烏蘓東北自雜佛洛巴顏喀喇達巴罕來注之又
東七十里七七爾哈納苦苦烏蘓源出蘓克布蘓
克山東北合威衣母撻鄂模色勒爾鄂模二池之水

又三十里入金沙江金沙江又東五十餘里有忒墨
圖水源出打克木喀木雜噶山二源俱西北流六十
餘里合而北七十餘里入金沙江金沙江又東三十
餘里折東南流百里有巴顏喀喇達巴罕之水東南
流折而北而西南入金沙江金沙江又南有查南打
租山之水自南來注之又東南北里有匝巴顏喀喇
山之水自北來注之又南流七十里東北有小水注
之西北有角拉克池水南流折東七十里入金沙江
金沙江又東南二百餘里入喀木境有水兩源自西

北合而來會始名布賴楚河亦名巴里楚必拉又東
南六十里依山麓折西南一百四十里又東南二百
里經郭冲廟北有朗朗普格山之水東南流折而西
南曲折三百里入金沙江金沙江又東七十里折而
南二百里有里邊達巴罕之水西南流折而西北又
西南共二百餘里入金沙江金沙江少折而西南二
百餘里至里木山之西南拉都格巴之東北有水自
西北合二水東南流四百餘里來會又南三百里至
達拉呵達之東越里拉達巴罕之西又少折西南二

百餘里至巴塘城西有水越里拉達嶺南麓西南合
二水經巴河城屯來會又南經巴塘他拉西折西南
始名巴楚河折南而東稍北而南而西南百餘里有
水自巴河屯西北重山中流出自西北合三河來注
之又東南流百餘里有敦楚河源出岡里拉麻爾山
西南曲流二百餘里折東南流百餘里合札木哈達
山流出之麻楚河又南百餘里合噶木布乃哈達山
流出之碩楚河又西南八十餘里入金沙江金沙江
又東南九十里有布木匝喇叭西南之水自東北來

注之又東南有八突馬郭楚山之水自東北來注之
又東南百餘里流入雲南麗江府西北邊界塔城關
之東又東南經巨甸汛橋頭汛東又東南經石鼓汛
北右受拉巴山之水始折而東北流經阿喜汛北又
東北經麗江府北境雪山之北曰金沙江此諸家論
源流之大概也

瀘水色黑故以盧名元和志謂瀘水在瀘縣西一百
二十里水峻急多石土人以牛皮船渡鶴州南至瀘
渡四百五十里蓋卽今金沙江也益州記曰瀘水源

出岫羅嚮下三百里兩峯有殺氣暑月不行故武侯
以夏渡爲艱水經注曰朱提郡堂琅縣有瀘津東去
縣八十里水廣六七百步深十數丈瘴氣鮮有行者
左右馬步之徑纔通三月四月經之必死他時猶令
人悶吐五月以後行者差無害故諸葛亮表言五月
渡瀘也丹鉛錄曰孔明南征由今黎州四百餘里至
兩林蠻自兩林南經瑟瑟部三程至嚮州十程至瀘
水四程至弄棟卽姚州也今金沙江在蜀滇之交一
在武定元林驛一在姚州之左卻據沈黎志孔明所

渡當在左卻瑟瑟兩部今邛部長官司白華前稿曰
榮經南孟橋傳是孟獲就擒處清溪東南有武侯城
武侯戰場寧遠廢瀘州蠻名沙城驗云亦武侯擒獲
處而明副使富好禮謂大渡河卽古瀘水武侯五月
渡此此皆非也漢文帝廢淮南王移之嚴道邛郵邛
嶺之有郵舊矣武帝使司馬相如開越嶲韓說開益
州唐蒙開牂柯華陽國志建興三年春武侯自安上
縣由水路越嶲五月渡瀘水征益州續漢書郡國志
越嶲無安上縣而常氏言縣去郡八百里在潛溪馬

湖二縣之間其地當在今黃螂馬邊及涼山夷界當
元狩元年張騫因蜀犍爲發間使通滇國建武十九
年益州夷叛遣將軍劉伋發廣漢犍爲蜀郡人卽朱
提夷討之尙渡瀘水入益州大破棟蠡等羌而唐蒙
先於焚道開閤鑿石其道廣四五尺武侯順流而下
由焚道而至安上入越嶲非自安上而入水也今成
都至建昌度清溪之大相公嶺絕大渡河非半月不
達而明洪武七年景川侯曹震來蜀開道以義眉至
建昌古有驛道平易可行較舊路近二三百里遂爲

開治嘉靖中富好禮令寧遠指揮丁鼇自相公嶺轉
獼狃之境而東達義眉爲戍堡五曰小菩薩曰黑麻
溝曰一梳水曰板房曰金石爲公館四曰舒快曰老
木坪曰獼狃曰射箭坪連絡三百餘里箭坪則編義
眉民五十人獼狃則土民五十人每堡及舒快木坪
各徙越嶲軍守之隆慶中越嶲指揮程昱議開鎮西
千戶所至獼狃舊路直抵義眉所謂新驛者是也孟
獲之叛在益州距越嶲尙遠而會理州西百五十里
有瀘水自建昌南流而入金沙江四五月間瘴氣尤

甚又水急多巉石土人以牛皮船爲涉杜佑謂武侯
所渡在此然則武侯之至越巂循唐蒙故道而其入
益州則循劉向故道也范成大言瀘州近城有渡瀘
亭或以敘州正對馬湖江馬湖夷武侯當自彼而渡
然成大不知渡瀘尙在漢越巂郡治以外世之人又
不知涼山夷境之昔爲漢縣其取道也便而悞以武
侯由今雅州而南卽峨眉東路之廢亦廢於明季搶
攘之秋修而復之不難也故竝著之

又金沙江卽古之繩水山海經曰巴遂之山繩水出

焉漢書曰繩水出遂久縣徼外過郡一行千四百里
鮮水出旄牛縣徼外南入若若水亦出徼外南至大
柞入繩過郡二行千六百里益州郡收靡縣南山麓
涂水所出西北至越嶲入繩過郡二行千二十里水
經注曰繩水出遂久縣徼外東南流分爲二水其一
支流東出經廣柔縣東流注於江其一南逕旄牛道
至大柞與若水合又曰繩水至大柞與若水合自下
亦通謂之爲繩水矣元和志曰念諾水本名繩水在
臺登縣西北七百里自羌戎界流入禺貢雖指曰若

水爲建昌衛打冲河繩水卽姚安府北金沙江

又金沙江卽古之黑水易氏曰樊綽蠻書載蠻水之
入南海者有四西洱河與瀾倉江合一也麗水與瀾
諾江合二也新豐川合勃弄諸水三也唐蒙所見盤
江四也綽指麗水爲黑水一名祿禪江而羅些城外
有山卽三危山其水從羅些城三危山西南行上流
出于西羌吐蕃下流南至蒼望城又南至雙王道勿
川有瀾諾江西南來會南經驃國之東而入海羅些
乃南詔吐蕃南北相距之地其西接吐蕃其東接劍

南東道之西境程大昌辨之曰麗水源流狹小不足以合二大州疆境又三危旣宅載之雍州則三危當在雍不當在梁驃在蠻爲南在蜀爲西南于海亦爲西南一角而麗水西行入驃始得南海則恐雍境決不斜入梁徼如此之多也薛季宣曰黑水今瀘水也酈道元說黑水亦曰瀘水若水馬湖江出姚州徼外吐蕃界中禹貢錐指曰古之若水卽禹貢梁州之黑水漢時名瀘水唐以後名金沙江而黑水之名遂隱然古記間有存者地理志滇池縣有黑水祠一也山

海經黑水之間有若水二也水經注自朱提至犍道
有黑水三也輿地黑水至犍道入江四也今瀘水西
連若水南界滇地東經朱提犍道其爲梁州之黑水
無疑按樊綽之麗水卽瀘水程大昌旣辨之矣而諸
家復指瀘水爲黑水者蓋綽兼雍梁二州言之故不
可從諸家則專指梁州而已然二州水名相同不必
執一況荒遠之區人跡罕到古今之變水道不常欲
執一水以界雍梁其誰信之

又有以西洱河爲黑水者水經曰益州葉榆河出其

縣北界屈從縣東北流過不韋縣東南出益州界入
牂牁郡西隨縣北爲西隨水又東出進桑關過交趾
蒼冷縣北分爲五水絡交趾郡中至南界復合爲三
水東入海酈注曰葉榆縣之東有葉榆澤葉榆水所
鍾而爲此川藪也不韋縣北去葉榆六百餘里葉榆
水不逕其縣自不韋北注者盧蒼禁水耳葉榆水自
葉榆縣南逕遂久縣東又逕姑復縣西與淹水合又
東南逕永昌邪龍縣東南逕秦臧縣南與濮水同注
滇池澤于連然雙柏縣又東逕滇池縣南又東逕同

竝縣南又東逕漏江縣又逕資古縣北與盤江合盤
水出律高縣東南監町山東逕梁水郡北資古縣南
又東逕漢興縣北入葉榆水葉榆又東南絕溫水而
東南注於交趾交趾北二水左水東北逕望海縣南
又東逕龍淵縣故城南又東左合北水又東逕曲陽
縣東流注于浪鬱其次一水東逕村溪縣南又西南
逕西于縣南又東逕羸陵縣北又東逕北縣南又東
逕稽徐縣又東逕羸陵縣南又東逕安定縣北又東
南合南水又東南逕九德郡北又東逕浦陽縣北又

東逕無切縣北又東逕勾漏縣又東與北水合又東
注鬱此其三也通典曰吐蕃有可跋海去赤嶺百里
方圓七十里東南流入西洱河合流而東號漾濞水
又東南出會川爲瀘水程大昌曰西洱海卽與漢志
葉榆澤相貫其廣處二十餘里其流處正趨南海樊
綽酈道元皆謂此澤以葉榆所鍾得名則其水之黑
似葉榆積漬所成凡其名實悉皆可證而古黑水祠
正在益州卽其地也禹貢錐指曰按水經注葉榆河
出益州葉榆縣之東有葉榆澤葉榆水之所鍾也其

水自縣南枝分東北流逕遂久縣西與淹水合初無
黑水之名何以知爲黑水之源其經流則自邪龍縣
東南逕滇池縣南又東與盤江合又東南至交趾蒼
舂縣入海此與會川相去懸絕並不合繩若入蜀江
安得謂樣潭水東南出會川爲瀘水卽滇池縣北所
祠之黑水哉

又有以瀾滄水爲黑水者李元陽曰瀾滄由西北逕
遷向東南徘徊雲南郡縣之間至交趾入海水內皆
爲漢人水外皆爲夷緬孟津之會曰髮人濮人以今

考之皆在瀾滄江內地理志謂南中山曰昆彌水曰洛山海經曰洱水西流入于洛故瀾滄水又名洛水元至元二年大理勸農官張立道使交趾竝黑水跨雲南以至其國則瀾滄江之爲黑水明矣史秉信曰蜀隴滇三省鼎立隴西南斜長入蜀滇西南斜長近隴蜀則尖長入滇滇隴之間如三足旂黑水源正在旂頭故雍以黑水爲西界以山論麗雪山與蜀松州諸山相接松去雍不遠計瀾滄之源當在雍之西元張道立使交趾由黑水入三崇山瀾滄經其麓側有

黑水祠此二家論黑水以瀾滄江當之也關楨兆曰
潞江流出永昌木邦爲喳哩江在大金沙之東瀾滄
江流出蒙順至姚關爲錦龍江又在潞江之東二水
源雖出於吐蕃距滇不過十數日其深洄大理蒙化
順寧永昌而入南海僅界梁州之西南不能遠界雍
州禹貢錐指曰水經注永昌郡有瀾滄水出博南縣
漢武帝時通博南山道渡瀾滄津土地絕遠行者苦
之歌曰漢德廣開不賓度博南越滄津其水東北流
逕不韋縣與類水合又東禁水合又北注瀘津水然

則此瀾滄水仍東北合瀘水入蜀江也若今瀾滄江
元人指爲黑水者則東南流至交趾入海與梁州全
無干涉又閻詠天下全圖曰金沙江南流自共龍旄
牛石下分枝南流至劍川浪穹大理太和爲西洱河
又東至賓川定遠又東南至南安合瀾滄漾備二江
又南經點蒼山打牛平茶山元江爲九龍江卽瀾滄
江入安南界入於南海一支東流爲金沙江又東經
永北程湖馬喇大姚姚州元謀會川又東至大赤口
羅羅分枝一南流至東川烏蒙雲南爲昆明池卽滇

池也一東北至馬湖敘州入岷江據此則西洱瀾滄
皆合金沙江矣

又有以大盈江卽大金沙江爲黑水者水經曰黑水
出張掖至燉煌過三危入南海熊夷曰燉煌今瓜
州也曷嘗有此水踰跨諸山以致於南海哉張機曰
大金沙江發源崑崙山西北吐蕃地卽禹所導黑水
也雲南志載金沙江出西蕃流至緬甸其廣五里徑
趨南海得非黑水源出張掖者乎黃貞元曰大金沙
江上源相傳近大宛國自理麻茶山至孟養極北不

聞有所往號赤髮野人境峭壁不可梯繩弱水不任
舟楫土人惟遠見川外隱隱有人馬形殆西羌之域
也今姑畧其源惟自其經流支流入海可見者言之
水流至孟養陸阻地有大居江橫榔江自西北來合
流謂之大盈江夷人名爲金沙江中產綠玉黃金白
金銅子金精石墨玉水晶琥珀又南流經官猛莫噉
莫卽猛掌有一江西來入之又南下昔朴怕蚌猛莫
猛外經蠻莫有一江自騰越大盈經鎮東南甸干巖
受展西茶山古湧諸水伏流南牙山麓出經蠻莫入

之又經蠻法魯勒猛拱遮鰲管屯大小莒蒲山峽謀
馬猛養怕崩山峽戶董鬼哭山憂撒又經溫板有一
江自騰越龍川江經界尾高黎共山隴川猛乃猛密
所部莫勒江至大公城江頭城入之又經猛吉準古
溫板名溫板江名流沙河又經猛憂馬噠喇有一江
自猛辨洗憂母南來入之又經止卽龍大馬革底馬
撒躋馬入南海鄭元慶曰閩氏圖載大盈江自西天
竺萬山中來西南流有檳榔江自西來注之合流至
猛密而潞江自北注之合流至緬甸之東八百媳婦

之西入于南海但圖中莫究其源按而求之蓋在星宿海大流沙之西北抵三危過沙州至哈密漢之燉煌郡北境卽伊吾廬也括地志言黑水出伊吾南流絕三危山正與圖相合亦與張機所稱相合乃禹貢之黑水無可疑者闡槓北曰雲南志載金沙江出蕃流至緬甸徑趨南海非謂麗江入馬湖之金沙江蓋名爲大金沙江者卽雍梁二州入於南海之黑水也黑水出西北界雍南海其源甚遠故其流獨大南至宣慰之鐵壁關江勢平濶金寶叢生則大金沙江之

名所從來也禹貢雖指曰如此則梁州奄有雲南極於交趾以一州而兼數州之地何至若是之遠此以理斷之而信其必不然也

又黑水禹貢雖指曰梁州之黑水自繩若而外又有五黑水焉漢書符黑水出犍爲南廣縣汾關山北至犍道入江一也水經注黑水出漢中南鄭縣北南流入漢諸葛亮牋云朝發南鄭暮宿黑水二也羌中黑水西南入白水通典扶州尙安縣有黑水元和志出縣西北素嶺山三也疊溪營西北有黑水卽古翼水

源出黑水生蕃東南徑茂州至安縣入於羅江四也
崇慶州西北有黑水入江源出常樂山溪石皆黑五
也此皆水之小小者非禹貢之黑水也

瀘水又南經麗江縣受無量河無量河源出沙里楚諾
爾池東南流爲多克楚河又東南受里楚河里楚河源
出里母山東南會沙魯齊山之水又東經里塘城合波
多拉達巴罕之水又西南經米黎拉岡入無量無量河
又東南入雲南永寧府西北波羅境內又東南受走馬
站河大松清水西卜諸河又西南受觀音河又西南入

瀘

無量河俗名五郎河音之轉也

瀘水又南經鶴慶州受漾共江漾共江亦名鶴川源出麗江縣東北玉龍山南經縣城西又南經州城東又南經落水洞又東北入瀘

瀘水又東南受枯木河枯木河源出鄧川州東爲清水東北受白牙河又東受高澗水又東北入瀘

瀘水又東經賓川州北受程海程海源出土順州東南南流受北河大冲河又南經陶營巡司東南爲三道河

入瀘

瀘水又東受綠溪綠溪源出賓川州南山東北經州城
西又北受雞足水又北受偏脚河又北爲達旦河入瀘
瀘水又東受一泡江一泡江源出雲南縣西北梁王山
東南經縣城北又東北經人頭關南受備甸河又北受
大姚縣西北之白鹽井水又西北經鐵鎖營又東北入
瀘

瀘水又東北經苴却營北受大羅河大羅河源出永北
廳東山東南受訛那河又東南入瀘

瀘水東會若水爲三江渡

瀘水又東南受大姚河大姚河源出姚安府南境北經府城東而北又西北流經光祿鄉受螳螂川又東北受小關水又東北經大姚縣城西受縣北書案山之交龍江又西受鐵索箐之水又南受小橋水又東受蜻蛉水又東北入瀘

瀘水又東受魚解江又東經黎溪站口受黎溪水又東受撒馬河

金沙江至廢黎溪州爲馬湖江其江嵐嶂特甚隆冬

人過祖謁皆流汗惟雨中及夜渡無害黎溪蠻故爲
黎疆唐南詔蒙閣羅徙其民於此明正統初蠻失的
嘯聚沐芹討平之 國朝康熙四十九年歸誠授土
千戶世襲○按三國志越嶲郡有舊道經旄牛中至
成都旣平且近自旄牛絕道已百餘年更由安上旣
險且遠越嶺太守張疑與夷人盟誓開通舊道千里
肅清復古亭驛秦封爲旄牛路當卽戡眉至建昌之
道也時在建興十四年而武侯南征在建興三年
瀘水又東受龍川龍川源出鎮南州西北東南流經州

城南又東南受紫甸河又東南經楚雄府城北受南安
州之青龍河又北受定遠縣水又東北受廣通縣水又
北受西溪又東北入瀘

瀘水又東經白馬口受暮連水暮連水源出大環州經
州城東合大麥水東北入瀘

金沙江東過白馬口分派入山伏流至東川土府自
山中流出

瀘水又東北經獅子廠又東北受滇池水滇池水源出
雲南尋甸西南果馬山爲龍巨江亦名龍濟溪經嵩明

州東南瀦爲嘉利澤又經故邵甸縣東合九十九泉又東經昆明縣城東爲盤龍江又南合黃龍溪瀦爲滇池亦名昆明池周廣五百餘里又南受大堡河大堡河源出新興州北經晉寧州之永興鄉北入滇滇水又東南受渠濫水又東南受螳螂川又東經安寧州東南受三泊水又北經州城東又東經富民縣城東南又東北經祿勸縣東南受烏龍江掌鳩河又東爲普渡河入瀘瀘水又東受玉虹河玉虹河源出會理州北至廬山南受鵝村河又南經州城東南又南受魯魁水又南入瀘

會理州故三絳縣也漢分置屬越嶲晉分置狼縣其
後狼與三絳並廢於遼唐上元二年置會川縣屬
州天寶末置會川都督府又置清寧郡會同軍後沒
於南詔蒙至自號絳部最爲強盛又徙白蠻守黎溪
宋爲會川府屬大理元至元九年內附屬落蘭部十
四年置會川路治武安州蠻稱龍泥城又領會理州
通安州麻龍州黎溪州永昌州隸羅羅斯宣慰司明
洪武十七年改所爲衛 國朝康熙二十九年分置
會理州雍正六年裁衛移州來治屬寧遠府○會理

州西南東三面距瀘而界雲南其西則元謀其南則武定其東則祿勸及東川也志謂州爲漢之會無三絳卑水地然漢時縣境濶於後世不應以一州包古三縣之地農部瑣錄曰漢志言會無縣有元馬山元馬祠夷人以馬爲謀則會無爲今元謀地按水經謂繩水逕越嚮郡之馬湖縣左合卑水水出卑水縣而東流注馬湖江則卑水縣當在今雷波

瀘水又北受會通河會通河有二源一出水底龍一出得五合流而南經鸞閣山又南經會理村又南受蘆那

水又南受阿木可租之水又東南入瀘

瀘水又東北經雷波廳南

雷波廳故馬湖地也元至元十三年置雷波長官司
屬馬湖路明洪武二十六年省入屏山 國朝雍正
六年置雷波衛屬敘州府乾隆二十九年改置雷波
通判駐新鎮鄉○雷波南境則雲南昭通府屬之吞
都夷雍正六年米貼夷反提督黃廷桂進圍吞都山
破之疏曰雷波隔江與井貼蠻井底蠻相望直逼涼
山西有烏角東有牛吃水東南有豆沙溪南有虎跳

渡西南有那比渡

瀘水又東經黃螂司東西分流爲大漢漕小漢漕復合流而東

黃螂巡檢司屬雷波其土司於雍正七年歸誠授土守備漢千總駐理之

瀘水又北而東受小江小江源出雲南尋甸州西南清水海東北受空山水又東北經東川府之涼水塘又西北經阿汪又西北受滄溪又西北受花溝水又西北經必古霸又北受則補水又西北入瀘

瀘水又西北折而東北受迤禮河迤禮河源出東川府南池泉東北受矣濯水又東北受洛泥河又北經府城西又北入瀘

瀘水又東北折而西北受牛欄江牛欄江源出雲南嵩明州四源合流爲車洪江東北受馬龍州之龍潭河又東北經霑益州北受沙河又東北受者海水又東受內瓦擦松樹二河又西北受墨土溪又西度索橋又西北入瀘

瀘水又東受西寧河西寧河源出龍馬山爲龍湖南流

爲夷都溪又南經西寧隘又南受鄠溪又東南受東興溪又東南受團魚溪又東南受瑪瑙溪又東南受什葛溪什葛溪源出小悍山東受芭蕉溪又南受神木山之黃鍾溪又南受楊村之瓜露水又東入西寧河西寧河又南經蠻夷司南入瀘

名勝記曰龍湖去郡三百里許四圍峻險長三十里廣七里中有堆如螺髻可容四百餘人去大江二百里其水與江同消長日夕作潮相傳有龍馬潛其中一名馬湖南經雷峯山隋人鐫三字於石壁其草有

毒牲畜過者必籠其口而行人亦相戒勿語語輒雷
霆應之

瀘水又東受大鹿溪大鹿溪源出雲南永善縣北大鹿
山東經平夷司北入瀘

瀘水又東受泥溪泥溪源出三公鄉南

瀘水又東經屏山縣城南受三渡水

瀘水自西而來距城二百四十里葉灘又二十里苦
竹灘又二十里三羌灘又三十里石梁子又十里母
猪灘又十里乾溪灘又十五里戊子灘又五里牛皮

灘又三十里箝箕灘又十里廟基子又十里桂溪灘
又二十里新開灘又二十里濕溪灘又五里雞肝石
又三里豹子腦又十二里結髮灘又十七里捲子灘
又二里廟渦經縣城南而東二里雞公灘又十三里
蓑衣灘又五里青苔石又五里波浪寺又十里辣子
渦又五里清明渦又十里芭蕉磴又十里黑坎又五
里新灘又十五里狗兒坎皆屏山境內險灘也又東
經宜賓境爲安流

屏山縣故楚道縣地也蜀漢分置馬湖縣屬越嶲郡

晉省唐爲焉廛馴騁浪瀉四州乾符二年高駢築城
號平夷軍宋初有蠻酋董春偕屯住其地歲貢馬號
馬湖部元至元十三年內附分置雷波泥溪平夷蠻
夷夷都沐川六長官司又置馬湖路總管府治夷部
溪口大德四年徙今治明洪武四年改土府安氏世
襲宏治九年改流官萬歷十七年置馬湖府屏山縣
國朝雍正五年裁府以縣屬敘州府

瀘水又東受橫江橫江源出雲南永善縣東南龍洞山
下之大湖西北受白水白水亦名八匡河源出貴州威

寧州故烏撒地北又東北經鍾灘又東北過石門山爲石門江又北受撒油河又北受葛魁河又北受會通溪又東北經筠連縣之西受大文小文二溪經慶符縣之西爲橫江至縣西南入瀘

石門卽漢武遣唐蒙鑿石以通漢中者亦卽隋史萬歲南征之道萬歲入南中見孔明碑銘曰萬歲後勝我者過此

瀘水又東經朱提山

山麓有瑞蓮池池有無種蓮間十數歲一花花開則

國家有大吉事相傳馬湖江側有石室魚常遊聚漁者言利之一日獲巨鯉衆分食之翌日又至俄見江中有三石室各長丈許廣六七尺顧見對岸石亦有三穴如鑿去者其長短與此無異而向之食魚者所居陷沒爲池卽今瑞蓮池巨鯉蓋龍子也愚按晉太康地志曰朱提縣治有千秋池華陽國志曰朱提縣有大淵池水名千頃池西南二里有螳螂山蜀都賦注曰靈池在朱提縣南十數里周四十七里名勝記曰千秋池疑卽瑞蓮池有朱提村卽立郡處今考朱

提山在敘州府西南六十里以寰宇記方里計之卽
隋開皇六年所置之開邊縣治也漢武帝建元六年
置犍爲郡元鼎二年置牂牁郡元封二年置朱提郡
領朱提螳螂南秦漢陽南昌五縣其犍爲郡初治犍
縣移治犍道又移治武陽若朱提郡距宜賓治六十
里則犍爲移郡何爲近逼朱提之犍道哉水經注曰
朱提山在朱提縣西南縣以氏焉在犍爲郡南千八
百許里建安二十年立朱提郡郡治縣故城郡西南
二百里得所管螳螂縣有瀘津卽瀾滄水東北逕不

韋縣東與禁水合然則朱提郡縣是今雲南安寧州
一帶州有螳螂川爲武定祿勸之普渡河東北入瀘
也又蘓林漢書音義曰朱音銖提音時北方人名匕
曰匙

瀘水又東受馬鳴溪

相傳土人鄭氏牧馬溪上產龍駒四蹄利爪朱駿頽
尾高可七尺州聞之將以貢行在所載至溪口攘鬣
長鳴躍于江宋邑人廖翰少以孝諠聞時蠻叛翰與
戰于馬鳴溪敗陷溪水中流數里不沒人皆異之

瀘水又東經宜賓縣城西南入江

江口有平石漢犍爲隗相母喜飲江水必得中流之水方以爲潔否則不嘗溪流湍激每有覆溺之患一日波心湧起一大石船可穩步乘之而汲人以爲孝感所致

農部瑣錄曰明正統間靖遠伯王驥南征會議開濬金沙江未果嘉靖初巡撫黃衷踵其議工役垂興爲土官鳳朝明所梗巡撫汪文盛委官體看朝明妻瞿氏阻之亦不行巡按毛鳳韶因巡洱海上議云雲南

水路直抵四川馬湖府初以遐僻禹跡不到遂爲土人所據國家始設郡縣同於華夏然貢獻之物扛官使之行李軍民之貨物擔負萬里筋力已疲而土官土舍因道路阻絕每懷異志及今國勢強盛不行開導將來必悔也是時鳳韶銳意開導而附和其說謂迤東道自雲南海口至安寧羅次富民只舊你革達吉普渡河安革法千土色江邊阿納木姑十三程惟土色有疊水迤西自雲南陸路至富民武定虛仁環洲至金沙巡檢司凡五程水路下船至馬刺母白馬

口燦刺則五曲革直勒則卓刺除魯圭寧抄荅甸沙
吉撒麻村土色大阿納木姑十四程則卓沙吉有疊
水者武定府丞某也謂金沙江上自麗江瀾滄姚安
武定下至東川烏蒙芒部宏治正德間馬湖安監生
放杉板嘉靖十七年王萬安放杉板俱係拖梢大板
大船建昌行都司奉欽採大木寧番越嶲鹽井建昌
五衛俱在上江打冲河三江口竝德昌千戶所或剗
牌或散放會川衛在下江科州採斫開江船行魯開
虎跳灘天生橋十分不爲險阻者金沙巡檢李朝宣

也謂自建檢司西過江五十里界會川衛每見客人
販木簾筏六晝夜卽抵馬湖隨簾下船或一二十載
糧食養猪畜跳簾擲船下五十六里有大小虎跳冬
春水落可施開鑿者姜驛丞梁松也謂自德昌所洗
迷村伐木下江一程至白水一程至會川衛甸沙關
一程至梅易所三程至和曲州金沙江馬湖建昌客
採大小板枋俱自德昌下河從金沙巡司經過直至
馬湖敘州者建昌木客何松也鳳韶旣得諸人之慫
恿以爲迤東極徑便但聞江內有蠻尖石兩邊巖石

生合成橋水從石縫流若迤西水面洪濶四時橫流
客商通販前後不絕中雖有虎跳二灘沙石易鑿則
斷然可通無疑議竟不行然迤西江行亦徑陰溝洞
天生橋未可軼出也天啟中安會倡亂貴陽道阻按
察使莊誥謂自巡檢司由白馬口歷祿勸之普隆紅
巖石刺鮮至廣翅塘其下有三灘水隘沒石乃可放
舟涸則躋岸纜空舟以行歷會理之直勒村罵刺土
色下有雞心石如堆三疊江中舟者相水勢緩急可
行又歷東川之踏照亂得頭峽刺鮮至粉壁灘甚駛

又歷巧家之驛馬河新灘至虎跳陰溝洞虎跳灘瀉
陡石不可容舟陰溝二山頽積水行山腹從陸路過
灘易舟而下歷蠻夷司之大小流灘烏蒙之黃郎鋪
貴溪寨業灘至南江口始安流自廣超塘至南江水
商行可十日乃經馬湖之文溪鐵索江邊數灘歷麻
柳灣教化巖又歷洩灘蓮花三灘會溪石角灘直抵
敘州城下說甚明晰然所議竟托空言康熙間楚雄
守馮魁亦綜此議迨乾隆五年決計開之自祿勸而
上萬難施功卽東川境內自吳公嶺飛雲渡藤橋濫

田壩小涵筒五灘阻絕乃越東川於昭通境內開闢
阨塞費金不貲復阻於異石象鼻柯郎虎口諸灘之
險乃從永善之黃草坪施功焉自是順流達敘府矣
然中經鍋圈洞旋圈似鍋瀑流千尺沂舟者必挽木
箱而上況自祿勸而上如陰溝天生虎跳諸灘石其
險百倍於此哉是知禹迹不至者後人不能強勝也